

Taitus

¹ Ẹ Kótóné kutó diratere whì bitu, Yesu Kerisoné dotẹyale *aposel* whì Pol-né dapó. Atéró dotẹyaleteita hãle mei, Kótóné ama sorokó su yóló betero betere so whìné Talepaae tuẹ tiki tiróo, kale bete mole fo tuẹ yóo, yópóló ẹ dotẹyalepó. Ai bete mole mo fo wisi diriyóló kisiparu, tuẹ tiki tiróló Talené ala eraté fu beteropó.

² Ti tuẹ tiki tiratere alaró mo bete mole fo diriyóló kisipare alatamota, take nalopaae mo wisi ala tuamó betaalopóló, mutere tuẹ tó mó bel-erapó. Ti ai alata, kapala fo mo sawakélé eneitere Kótóné sàró haetamo kaaraai teópa, mo taketitei yóló munélipakalepó.

³ Dá aluyaosóró tao su betere Kótóné ama fo wisi ẹpaae mo wisiyóló kaae taru, so whìpaae yó male fae depa, yálo yó maleteiné Kótóné ama mo eraalopóló tukóló muló betere be demótóró ama yóló mulale fo hãkearalepó.

⁴ Taitus-ó, yálo i dere asẹta, damo wusuró mo betá fotóró wosóló Talepaae tuẹ tiki tiró betere alakélé betá ala ereteiné yá yálo hosaa mo turó mole naalepa i dere ape. Dáné aya Kótóró dá tao sóró wisiró betere whì Yesu Kerisotamoné hamokoróló tao sere alaró hosaa muni deóló dua betere alatamo yá tuapaae erópóló yae.

Atimané diyaaí yale kutórape kemerópóló Tatus Krit-mó beterale fo

⁵ Ẹ faairaalu, yá weíné bopéro daaló betere hae Krit-mó beteróló fele bete i ape. Mepaae

diyóló kemeréni, kwia mupa taarale kutórape naao donoróló diyóló kemeróo, ai hae kwiamó tẹ mole be huluamó betere Keriso so whị tẹteróló kaae tawaaire whị disirape sóró beteraté kweyóo, yópóló taaróló felepó.

⁶ So whị tẹteróló kaae tawaaire whị disi sóró beteratepa, i ala ere whị sóró beterae. Me dowi ala yalepóló só derénitere whị betóo, sokélé mo betatóró dokóo, ama naale senaalekélé Talepaae tuẹ tiki tiró betóo, mepaae so whịné ama naale senaale hama alima aqmó bitini dowaae fóló, atimané tó tiki felé yaaire ala du betepa, só deratere fo ini yóo, dere whị sóró beterae.

⁷ Atéro beteratere whịta, Kótóné ama dirae yale kutó tẹteróló kaae tareteiné mepaae whịné me dowi ala yalepóló só deratere fo ó mepaae whịné dere fo woseni dowaae furaalu, ama kisipa mole alatóró sya fole whị ó hapale fopaae butere whị ó *wain* wẹi mo dekéro nokole whị ó hapale fopaae buturaalu hõle sere whị ó doasi *moni* saai ekẹleru, kapala ala du betepa, ti atétere whị beteranénipó.

⁸ Ai dosayayale alarape ini, uké whị wisiyóló dape sóo, wisi ala maaté yaai ekẹle yóo, ama tikiné ekẹlere ala ini, ą amatei tẹteróló kaae tawóo, ama dere ala fea mo donotóró yóo, Talené ama ala erópóló, kae betero betere whị betóo, yaaitere alarape taleyóló mo bete mole alatóró yó tare whị betóo epa, ti so whị tẹteróló kaae tanópóló, sóró beterae.

⁹ Térapa, kale bete mole mo fo mené yapaae yó melaleteti diriyóló tuẹru, mepaae so whị keteke bulóo, ai fotamo bóe du betere so whị donoróo, enére whítóro sóró beterae.

¹⁰ Ti haḷe hoḷo whi sóró beteraḷse dere fota, ti i betené dapó. Kale mo fo wisitamó bóe du betere whirapekélé, bete muni haḷe hoḷo fo du betere whirapekélé, kapala fo yóló so whi dilikitu betere whirapekélé fea betó mole tuamó tiki sekaḷ tikaē du betere whirape mo dekeró betó moleteiné dapó.

¹¹ Atimané du betere alata, enénire fotei ai yó mótu betere ape. Aita haḷe dumi, kapala so whi dilikóló *moni* saai du beteraḷpó. Atéro yó mótu betere foné beta whiné ama soró naale senaaletamokélé, ama fake whikélé, atima fea beta be dolomó betó moletei ai dorótu betere ape. Atétu betere ala momó kae yaḷsóró, mo taalae yóló foné sae.

¹² Ti ai Krit haemó betó mole whirape atimané fo eratere ḷóló whi betaḷné i fo eraḷpó. “Wéiné bopéro daaló betere Kiriti haemó betó mole so whi fea kapala fo buóo, hupu haḷné dere kaae, dowi ala haḷeamó hoḷo yóo, dekaýóló bitu ḷla maaté dekeró naai eḷeḷe yóo, du beteraḷpó,”

¹³⁻¹⁴ Atimané fo eratere ḷóló whiné i alarape du betepa kelalepó dere fota ti mo dapó. Térapa, Taitus-ó, naao teḷeróló kaae tare so whi atimané tué tiki mo diriyóló tirópóló, Juda fake so whiné dolḷa foró kale mo bete mole fo hḷrale whirapené i ala yae dere fotamo wosaḷsóró, mo deteraa yóló atima foné sóró ma yae.

¹⁵ Mepaae wisi tuétóró mole whi atimané dere alaró dere fotamokélé, mo wisiyóló du beteraḷpó. Téretei, mepaae whi tué tiki tiró bitiniru, atimané hosaa tuamó dowi kisipa mupa, ti ama dere foró dere alatamokélé wisini, mo turó dorapó. Ti i dere fota, mo dapó. Atimané tué tikiró hosaa tuamó

mole alatamota, wuliné api fulukó fóló ọla wisi dorótu dere kaae, dowi alané atima mo ti doró beterapó.

¹⁶ Ti Kótó tuérapó du betepatei, atimané dere alané ti Kótó tué nipóló hakeamó yó matapó. Atima mo sonaalei ala du betere so whị betóo, dere fokélé woseni, tikóo du bitu, wisi ala yaaire mo sụnipó.

2

Sere otere ó teó so whịpaae Talené bete mole fo etéro yó manérapóló ere fo

¹ Naa fo yó móturaalu, kae kae fotamo touróló yó meni, Kótóné mo bete mole fotóró erótu betae.

² Atéro yó móturaalu, mepaae hẹle Keriso maaté betere whị disirape atimané dere ala sawa tétitóró yóo, nokole ọlakélé kisipa tekeyóló tétitóró nóo, so whịné atima dere ala kilituraalu, mo donoi ala dapóló doi mulóo, atimané mepaae ala yaai fopaae hapale buni, hotowaró kaae taru, tué tekeyóló yóo, Talepaae tué tiki tiratere alakélé, yaala sókó fole alakélé, Talené ala taaréni, hẹle yó tare alakélé mo diriyóló kisiparu, erótu betere whịtóró beterópóló, ma fo yae.

³ Até dere kaae, so disirapepaaekélé, atimané dere ala Talené so whịné dere alatóró du beterópóló yae. Téturaalu, so whị eratere fo ó *wain* wẹi dekeró naai ekele ini, mo wisi fo maaté yó mótu beterópóló ma yae.

⁴ Téturaalu, ai so disirapenémo mepaae teó so-rape atimané whịró naale senaaletamopaae yaala

sókó fole ala du beterópóló, etéró yae yóló yó manérapó.

⁵ Atimané me ala yaai fopaae butere ala hapale ini, hotowaró kaae taru, tué tekeyóló mo wisi alatóró yóo, bemó ɔla bilitere alakélé, naale senaale kaae tatere alakélé, be kaae tatere alakélé, mo kelaalo kokɔi alaró hosaa tuámó me kisipa muni, mo wisi kisipa betɔ muóló, atimané whi aomó beterópóló ma fo yae. Ama fo yae deretei hale meipó. Atimané du betere ala mepaae so whiné kilituraalu, Kótóné fo bete muni nisyóló doka doka yóló faleyaqsóró dapó.

⁶ Whi disiró so disitamopaae yale fo kaae, teó whipaaekélé atimané mepaae ala yaai tué tekeyóló hotowaró yópóló, ma fo yae.

⁷ Naa du betere wisi ala so whiné kolóló, atimané tokóló yópóló, yó mótu folosóró naapi yae. Atéró, naao yó matere fomo kae yóo, dere alakélé kae yóo ini, mo betɔ alatóró erópóló yae. Téturaalu, i ala tómó mole ala kaae aqréni, mo bete mole alapóló tué muóló yó mótu betae.

⁸ Atétepa, ti naao yó matere fo atimané wosaalomeipóló, mené só deratere ala enénipó. Ti noa yaqsóró du meipó. Yátamo bóe du betere whirapené da hasókó fole ala initepa kilitu, atimané yale fomó atimatei hale yópóló dapó.

⁹⁻¹⁰ Atéturaalu, wae sóró kutó diratere so whirapepaaekélé atima teteróló kaae tare whi aomó bitu, atimané tué tiki felé yópóló kutó wisyóló dirae yóló ma fo du betae. Kutó diratere whirapené atima teteróló kaae tare whiné dere fo woseni dowaae fóo, atimané mepaae ɔla ɔlakélé ɔlémi sóo yaqsóró yae. Aténi, atima teteróló

kaae tare whīrapené me ɔla ɔlémi nokole ala ini yóo, erae dere alakélé mo wisiyóló eróo depa kilituraalu, kutó diratere whī wisipóló tuę muaalopó. Atéró atimané mepaae alarape duraalu, i dere ma fo sya fóló eratepa, ama fo woseturaalu, ama fo wisata mo bete mulapóló, Tale dukirópóló dapó.

11 Ti noatepae, so whī aluyaqsóró Kótóné ama hamokoróló tao sere ala mió i alimó betere so whī feané kolópóló hakearó beterapó.

12 Kótó bitini nisi yóló du betere alaró i haemó ekęleyóló du betere alatamo yae yóló sętepa, ai ala mo yaalo meipó yóo, mió i betere alimó mepaae ala yaai kisiņa tekeyóló yóo, mepaae dere alakélé mo donotóró yóo, Kótóné ama ala hęle eró tawóo yópóló, ai fo wisinétei dąpaae yó mótu beterapó.

13 Dą noa wisi ala kelaai hękesetamo kaae tawóló betere? Dą tao sere whī Yesu Keriso ąta, dą tęteróló kaae tare doasi Kótó beterapóló, ama kae ere dę wisinaaletamo wale ala kelaairaalu, dą hąjtamo kaae tawóló i betere ape.

14 Dą dowi alané dokóló muló betepa, ai sekęné ama betere betené dą dupuróló ą sukąleteita, hęle meipó. Dą dowi ala mo sawakélé muni, mo ama so whıtóró bitu, mo wisi alamaaté ekęle yóló deté fu beterópóló, erapó.

15 Atęrapa, ai dosąayale alarapetamo naao yó mótu betepa, ti mo wisirapó. So whinė mepaae hoko alarape taalae yóló foné sóo, du betere wisi ala taaréni ketekę bulóo yae. Ti yąta, Talenétei ama ala erópóló, sóró beteró betepa, mepaae so whinė yą belei aleróló só deratepa, ai dere fo

woseni, ai bete mole fo yó matere ala betą du betae.

3

Mo wisi ala betą erótu betae ere fo

¹⁻² So whị tẹteróló kaae tare *Gavman* whịraperó mepaae ala kaae tanópóló sóró beteró betere whịrapetamo aomó betae yóló Kótóné so whịpaae ma fo yae.

Atéturaalu, atima kale tẹteróló kaae tare whịrapené yae dere ala sya fóló eróo, mepaae wisi ala ketekẹ buóo, me whị eratere fokélé ini yóo, mepaae so whịtamo naameyóló mo dua betóo, me whị hamomané kisipa sekẹ yaosóró dere ala kisipa tekeyóló yóo, bopé fake ini, deróló dua betóo erópóló ma fo du betae.

³ Take betale alimó ɗakélé kisipa okoko yóló hoko bitu, ai fo wisi wosóló aomó bitini, dowaae fóló du betale alané ɗa dilikitu betalepó. Atétepa, ɗané tó tikiné ekẹle du betale alaró kae kae du betale feléi alatamoné ɗa dokóló wae sóró kutó diratere whị beteró beterepó. ɗané no nené dere ala kilitu, ɗakélé ai ala enée yóló dei kisipa muturaalu, ɗané atima hóróo, atimanékélé ɗa hóróo, deté fu betalepó.

⁴ Tépatéi, ɗa tẹteróló kaae tare Kótóné ama ere wisi alaró yaala sókó fole alatamo haķearale sukamótóróti, ɗa aluyaosóró ama tao salepó.

⁵ Ti ama ɗa tao saleteita, ɗané me donoi ala depa kolóló initei, ɗa kolené sukutu tao sere bete bitu, tao salepó. Téturaalu, Talené ama fokóló ɗa ama naale senaale deyóló beteróo, ɗe Kepe Wisiné kisi whị aleróló beteróo erapó.

⁶ Talené ai Deji Kepe Wisita, da so whi fea tao sere whi Yesu Keriso tuamó betepa, Talené dapaae mo turó suniyalepó.

⁷ Atére alata, Talené ama hamokoróló tao sóró, mo donoi so whipó ereteiné da ai mo ti betere bete sóró taru, ama wisi wisi ala Yesumó matere kaaetóro damókélé matepa saalopóló hajtamo kaae taté fu beterópóló erapó.

⁸ Ai fota, mo bete mulapóló tué tiki tiraaire fopa, mió Kótópaae tué tiki tiró betere so whikélé keteke buóló mo wisi alatóro du beterópóló, ai fo naao mo diriyóló tuéru, donotóro yó mótu betepa, mo wisirapó. Ti ai dosaaté wale alarape feata, wisi alatóro ereteiné so whi fea tao sóró wisiranérapó.

⁹ Tépatéi, kisipa okokoi whirapéné dóroi duraalu hale hoko dere fokélé, da deyaairaaalu deté wale noutererape dosaaté wou betale alakélé, Mosesné yóló muló betere fomó alale sere alaró hqle sere alatamoné dere fo mo wosaqse. Ai alarapéné, so whi tao sóró wisiraaire bete mo munipó.

¹⁰ Diá betá kisipa muóló betere ala mepaae whiné tekeratepa, taalae yóló foné sae. Atéro foné senaalemó, naao dere fo wosenitepa, kale yale kaae momó foné sae. Ténalemókélé mo ti wosenitepa, momó kae ini, ama enére ala deté fu beterópóló mo ti taalae.

¹¹ Atétere whita, dowi ala a tuamó faanuraalu, dowaae fóló du betere alané amatei a ai só derótu betere ape.

Mo kemeróturaalu Pol-né Taitus-paae ape yale fo

¹² Artemas ó Tikikas yało ya beterepaae ai dotonatapa, atamo ya beteremó sókó wapa, ti ya damo

Nikapolis be huluamó hokolaa yaalopa fae. Ti mió i waaire sosóli alita, dāmo ai bemó betepa kemeyópóló faai kisipa mutapó.

¹³ Fo tokótamo depa tao sóró fo eratere whi Senas-ró Apolos-tamo uké furaalu sóró faaire mepaae ɔla ɔlakó yaɣaɣepa, ti atimaamo tao sóró melae yóló i dere ape.

¹⁴ Yaɣtamo aimó betere dā Keriso fake so whi atima betere dokɔ nokole ɔla ó mepaae so whi tao saaire ɔla ɔla yaɣani, mo sūmó mulópóló, kutó ketekeɣ buóló diae yóló ma fo du betae.

¹⁵ Imó ɣtamo betó mole so whiné yaɣpaae kɔleó dapó. Talepaae kisipa tiki tiró bitu, dāpaae yaala sókó fu betere so whipaae kɔleó yae. Térapa, Tal-ené hamokoróló tao sere ala diā feapaae erópóló yae.

**Yesu Kerisoné So Whi Tao Sere Kisi Fo Wisi
The New Testament in the Falopa Language of Papua
New Guinea**

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Apr 2025 from source files dated 31 Aug 2023

0102a9df-173c-5a64-b766-14ab67a86105